

Kalaallit Nunaanni immap naasuinik pitsaanerusumik tunisassiornissaq anguniarlugu, kiisalu annertunerusumik pisuussutit atorluarneqarnissaat pitsaanerusumillu periarfissiuunniarlugit apeqquteqaat aallaavigalugu oqallisissiatut siunnersuut.
(Inatsisartuni ilaasortaq Jens Napaattooq, Partii Naleraq)

Akissuteqaat

(Inuussutissarsiornermut Nukissiuuteqarnermut Ilisimatusarnermullu Naalackersuisoq)

Siullermeerinnineq

Naalackersuisut sinnerlugit Inatsisartunut ilaasortaq Jens Napaattooq Partii Naleraq qutsavigissavara, nunatsinni immap naasuinik iluaquteqarnissamik periarfissat siuarsarneqarnissaannut qanoq iliuuseqarsinnaanersugut apeqquteqaat aallaavigalugu oqallinnissamut siunnersuuteqarmat.

Naalackersuisut periarfissanik ujarlertuaannarput inuussutissarsiornerep ineriartortinnissaa nukittorsarneqarnissaalu eqqarsaatigalugit. Suliassaqarfimmi tamatumani soorunami inuussutissarsiutinik nutaanik periarfissaasinnaasut taamaluni nunatsinni inuussutissarsiornikkut siuariartornissamut periarfissat salliutinneqartarput.

Immap naasui tamatumani ilaapput inuussutissarsiornikkut ineriartortitsinissami periarfissat. Atlantikup avannaani Kalaallit Nunaat minguinneerpaamik imartaqarpoq, immap naasuinik nerineqarsinnaasunik naatitsisarnissamut katersisarnermullu periarfissaqarluarluni.

Immap naasuinik Kalaallit Nunaanni nerisarneq ileqquuvoq, kisianni immap naasui niuernikkut atorneqarnikuunngillat. Immap naasui tamanut atorneqarsinnaapput, aamma immap naasuisa nerisaanerit annertusiartorpoq, iluaqutissatullu atorneqarsinnaanera isiginiassagaani naleqartorujussuulluni, ingammik suliffeqarfissuarni akuutissatut atorneqarluarluni. Siammasissumik atorneqarsinnaavoq nerukkaatissatut, aammalu naggorissaatitut atorneqartarluni. Eqqarsaatigineq ajukkatsinnik ulluinnarni immap naasui akuutissatut arlaqartunut atorneqartarput. Immap naasui pinngortitami imaluunniit naatitatut katersorneqarsinnaapput. Immap naasuinik naatitsinermi pissuseqatigiit, angissusaat aamma annertussusaat nakkutigineqarsinnaapput.

Taamaattumik nuannaarutissaavoq inuussutissarsiortut akornanni periarfissat maluginiarneqareermata, qeqqussanillu aningaasarsiut inngortitsiniarneq nunatsinni

sulissutigineqalereerpoq. Royal Greenland A/S akuersissummik tunineqareerpoq 2018-imiit qeqqussanik naatitsisarnissamut 2021-ip tungaanut. Siunertaavoq qeqqussat sukkulinnik taaneqartartut aammalu qeqqussat suluusalinnik taaneqartut Maniitsup eqqaani naatinneqalernissaat.

Naalakkersuisut kissaatigaat qeqqussanik nioqqutissiortunngorsinnaasut siuarsaavigineqarnissaat, neqeroorutigineqarporlu aaqquissuussineq tamatuminniga tapersersuisinnaasoq. Aallarnisaasartut immap naasuinik iluaquteqarlutik avammut niueruteqarnissamik kissaateqartut Greenland Business-imit siunnersorneqarsinnaapput. Greenland Business-ip allaffissornikkut aqutarai Naalakkersuisut inuussutissarsiornikkut siuarsaanermik aaqquissuussineri. Ilaatigut qinnuteqartoqarsinnaavoq nioqqutissiassanik ineriartortitsinernut aamma tapiissutinik avammut niueruteqarnermik ingerlatsiniarnermi, siunnersortinit immikkut ilisimasalinnit siunnersorneqartarneq periarfissaalluni, aammalu nunatsinni kalaallit inuussutissiaasa atorineqarnerannik siuarsaasoqarsinnaalluni. Suliffeqarfimmi aallartermut aamma Greenland Business-imit aningaasani annikitsunik attartorniarlutik qinnuteqarsinnaapput.

Nunaqarfimmi isorliunerusunilu immap naasuinik niuernikkut iluaqutigineqarnissaq aamma periarfissaavoq. Ukiut tamaasa nunaqarfinnut aningaasaliissutit kommuninut tallimaasunut Naalakkersuisunit agguanneqartarput. Nunaqarfimmi isorliunerusunilu inuussutissarsiornikkut siuarsaasinnaasunut pilersaarusanut suliniutinullu aningaasaliissutit tunniunneqartarput. Immap naasuinik niuernikkut iluaquteqarnissamik nunaqarfimmi isorliunerusuniluunniit suliffeqarfik suliaqartoq kommunimut nunaqarfinnut aningaasaliussassanik qinnuteqarsinnaavoq.

Suliffeqarfinnut alla periarfissaq tassaavoq, nunaqarfinnut avinngarusimasuniittunullu nioqqutissiorfeqarfilinnut, toqqaannartumik tapiissuteqarsinnaanermut Naalakkersuisut siunertanut aalajangersimasunut atugassaasinnaasunut. Tapiissuteqarneq suliffeqarfik aammalu Naalakkersuisut akornanni kiffartuussinissamut isumaqatigiissusiornikkut tunniunneqartarpoq.

Immap naasuinik nioqquteqarlutik suliffiuteqartut, nunat assigiinngitsut akornanni niueqateqarusuttut, niuernikkut nittarsaassinerni peqataanissaminnut periarfissaqarput. 2018-mi ukiakkut Kina-mi ukiullu siuliani Japanimi aamma Koreami kujallermi ingerlanneqartumi suliffeqarfimmi pilersaarinermi Naalakkersuisut peqataapput. Niuernermi taakkorpiat pingaaruteqarput qeqqussanik avammut niueruteqalersinnaanermi.

Qeqqussanik suliaqartarput Naalakkersuisut inuussutissarsiutulerisunut neqeroorutigisartagai arlallit atoreerpaat. Qeqqussanik sanasartoq 2014-imi, 2015-imi 2016-imilu avammut tunisassiornissaminut aningaasaliiffineqarsimavoq. Inuussutissarsiutitigut tapiissutinut ilaavoq inuussutissarsiornermut tunngatillugu

klippekorteqartitsineq, nioqqutissiornermut atortumut tunngatillugu kiffartuussinissamut isumaqatigiissut kiisalu avammut tunisaqarnissamut Naalakkersuisut Koreallu Kujataani 2016-imi inuussutissarsiortut naapitinneqarneranni peqataanermut atorneqarsimallutik.

Iisimaneqartutuut inuussutissarsiutitigut tapiissutinut periarfissat inuussutissarsiornermut ineriartortitsinermut peqatigiinnit soorlu Greenland Business annertunersaat ingerlanneqartarput. Taamaattoq peqatigiit namminerisamik akisussaaffigaa, annertuumik tapiissuteqareerluni, iluanaaruteqarnartumik peqqinnartumillu suliffeqarfiup ingerlanneqarnissaa, Naalakkersuisuninngaanniit neqeroorutit annertungaluartut.

Siunissami inuussutissarsiutinik ingerlatsiniarnermut suli amerlanerusunik periarfissaqalissaaq.

Naalagaaffimmut isumaqatigiissusioqqammerpugut, taannalu aqutugalugu 220 mio. kr.-it aningaasaliissutigineqassapput. Aningaasaliissutillu taakkua nutaanik inuussutissarsiorfinnik pilersitsiniarnermut atorneqassapput. Taamaattumillu Greenland Venture Vækstfondenilu suliniutinut nutaanut tunngatillugu pitsanngorsaanermut peqataanerussallutik.

Tapiissuteqarnerit aqqissuussinerit pioreersut arlaqarput Naalakkersuisunit aallartinneqarsimasut, taamaasilluni inuussutissarsiutit nutaat siuarsarumallugit periarfissanik peqarluarluni. Taamaattumillu immap naasuunik avammut niueruteqalernissamut periarfissat pitsaasuupput, atugassarititaasullu killiliussat suliffeqarfinnut nutaanut periarfissaqartitsillutik pitsaasunik.

Naalakkersuisut qilanaaraat imaqarluartumik isumatuumillu oqallittoqarnissaa inuussutissarsiornikkut periarfissat pissanganartut nutaat eqqarsaatigalugit inuiaqatigiillu ataatsimut eqqarsaatigalugit.